

Aruba a perde un gran yiu di tera



ORANJESTAD(AAN) - Diaranzon mainta a drenta e tristo noticia cu sr. Mirto Ismael Lacle mihor conoci como Chomi a fayece inesperadamente.

Ta dos siman pasa Chomi tabata na DIARIO pa colabora cu un edicion special pa e celebracion di Dia di Betico.

Henter dia el a atende tur e actividadnan na Santa Cruz en coneccion di e celebracion di e dia festivo aki. Chomi tambe tabata forma parti di Aruba su Schutterij y a bringa tambe pa nan reconoce e schutternan di Aruba.

Chomi tabata tin un gran amor pa su patria y a demostra esaki tambe door di traha schouder cu schouder cu sr. Betico Croes pa e realisacion di Status Aparte. Hopi duro e tabata traha pero semper felis y contento pasobra ta pa su isla stima e tabata traha.

E tabata e man drechi di Betico y semper Betico tabata pidiele pa traha varios speech pe. E tabata organiza e reunionnan di contacto di partido MEP y tur aña tabata bay afo y bestel e banderinnan pa celebracionnan di Aruba. E tabata presidente di e lidernan di barío, organisa, haci tur e prepara-

cionnan na e stemlokalnan, traha spotnan y pancarta organisa manifestacionnan cultural y mas.

Hopi poemanan e tin skirbi tocante Nos Himno y nos Bandera.....y pa cada ocasion special p.e. Dia di Mama of dia di Tata henter e pueblo di Aruba por a lesa esakinan den corant, scuche na radio of television declamando su poesianan y propio inspiracion. E tabata miembro di e prome Comision di Himno y Bandera y a traha hopi duro pa Aruba por a haya su propio bandera.

Ta na su cas na Edisonstraat 13 na Companashi cu ta prome bez a hisa e bandera di Aruba. Orguyoso e tabata mira con e bandera tabata bula den biento.

Tambe semper e tabata scirbi historia di Rufo Wever, Carlos Gardel y topiconan di antes. Pero hopi ta esnan cu ta corda con grandi e tabata den futbol. E tabata e delantero di e team campeon RCA di Solito. El a representa hopi vez Aruba den exterior hungando contra teamnan grandi manera Feyenoord. El a hunga na Corsow, Boneiro, Venezuela, Colombia, Surnam y Haiti.

No solamente e tabata un gran futbolista y declamador pero tambe un persona cu un gran curazon y cu un gran carisma. Semper bay cu un sonrisa riba su cara.

Aruba a perde den Chomi Lacle un persona cu a traha pa su isla stima y a percura cu hopi storia a keda conserva y pronto lo wordo publica pa asina un y tur haya sa mas di e historia real di Aruba su cultura y su Status Aparte.

Cu Chomi sosega na paz.